

NO. SOALAN: 21

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 8 OGOS 2017 (SELASA)

RUJUKAN : 10044

SOALAN :

Puan Teo Nie Ching [Kulai] minta MENTERI DALAM NEGERI menyatakan:

- (a) bilangan kes perkahwinan bukan Muslim yang melibatkan perempuan bawah umur 18 tahun mengikut pecahan etnik serta negeri dari 2007 hingga sekarang; dan
- (b) jumlah permohonan perkahwinan bawah umur mengikut pecahan etnik serta negeri dari tahun 2007 sehingga kini; dan pencapaian Taskforce Perkahwinan Bawah Umur.

JAWAPAN:

Tuan Yang di-Pertua,

Dari tahun 2007 sehingga 30 Jun 2017, Jabatan Pendaftaran Negara (JPN) telah mendaftarkan perkahwinan bagi 4,885 orang perempuan berumur 16 dan 17 tahun, yang mana ini adalah merupakan had umur minimum pendaftaran perkahwinan bagi seseorang perempuan di bawah Akta Membaharui Undang-Undang (Perkahwinan dan Perceraian) 1976 [Akta 164]. Pendaftaran perkahwinan di JPN bagi perempuan berumur 16 dan 17 tahun ini perlulah terlebih dahulu mendapatkan kebenaran melalui lesen yang diberi oleh Menteri Besar atau Ketua Menteri.

Perincian mengikut kaum / etnik pula adalah seperti mana berikut:-

Kaum / etnik	Jumlah (Orang)
Cina	2,347
Etnik Sarawak	1,329
Orang Asli Semenanjung	467
India	423
Lain-lain	202
Etnik Sabah	117
Jumlah keseluruhan (Orang)	4,885

NO. SOALAN: 22

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : IR. SHAHARUDDIN BIN ISMAIL
[KANGAR]**

TARIKH : 8 OGOS 2017

RUJUKAN : 10043

SOALAN :

Ir. Shaharuddin Bin Ismail [Kangar] minta MENTERI DALAM NEGERI menyatakan apakah tindakan serta langkah Kementerian untuk mengatasi masalah isu pemerdagangan manusia, penyeludupan petrol dan diesel dan juga isu penyeludupan barangan yang berbahaya seperti senjata api di ke semua pintu-pintu masuk negara dan kenapa usaha membanteras gejala ini tidak berkesan walaupun pelbagai sistem kawalan sempadan telah dibuat.

JAWAPAN:

Tuan Yang di-Pertua,

Antara usaha yang telah dilaksanakan adalah dengan mewujudkan kerjasama strategik Angkatan Tentera Malaysia (ATM) dengan Polis Diraja Malaysia (PDRM) di bawah program *National Blue Ocean Strategy* (NBOS) di mana anggota ATM dan PDRM bekerjasama dalam melaksanakan kawalan dan operasi di sempadan Malaysia-Thailand.

Agensi Kawalan Sempadan Malaysia (AKSEM) yang ditubuhkan melalui naik taraf Unit Pencegah Penyeludupan (UPP) Malaysia adalah salah satu inisiatif yang telah diambil Kementerian Dalam Negeri bagi meningkatkan lagi kawalan keselamatan Negara di sempadan darat negara. AKSEM yang terdiri dari gabungan pelbagai agensi penguatkuasaan seperti Polis Diraja Malaysia (PDRM), Jabatan Kastam Diraja Malaysia (JKDM), Jabatan Imigresen Malaysia (JIM), Agensi Anti Dadah Kebangsaan (AADK), dan Lembaga Kenaf dan Tembakau Negara (LKTN) di bawah satu pasukan petugas dilihat dapat mengambil tindakan yang lebih berkesan, holistik dan bersepadu dalam membendung jenayah rentas sempadan di sempadan Malaysia – Thailand.

Bentuk penguatkuasaan yang dilaksanakan oleh AKSEM adalah melibatkan aktiviti seperti risikan, serbuan, tangkapan, sekatan jalan raya tetap (*static*) dan tidak tetap (*mobile*) serta

rondaan di kawasan sempadan Malaysia – Thailand. Semua dapatan yang terhasil daripada operasi yang dilaksanakan seperti tangkapan pesalah dan rampasan barangan yang terlibat dalam aktiviti penyeludupan akan diserahkan kepada agensi penguatkuasa yang berkenaan mengikut peruntukan undang-undang serta peraturan yang berkaitan bagi tujuan siasatan lanjut dan pendakwaan.

Tuan Yang di-Pertua,

Bacaan kali kedua Rang Undang-undang AKSEM 2017 yang akan dibentangkan pada sidang parlimen pada kali ini akan membuka ruang kepada AKSEM untuk bergerak lebih maju ke hadapan di dalam mengawal sempadan darat negara. Pada ketika ini, inisiatif telah diambil oleh AKSEM di mana satu draf *Standard Operating Procedure (SOP)* Agensi Kawalan Sempadan Malaysia (AKSEM) telah disediakan bagi menyelaraskan operasi penguatkuasaan agensi-agensi yang bertanggungjawab di sempadan darat negara. SOP ini kelak akan menjadi panduan kepada agensi-agensi yang terlibat di dalam usaha menangani jenayah rentas sempadan. Ini juga adalah salah satu persediaan untuk AKSEM diperluaskan ke sempadan darat negara di Sabah dan Sarawak secara berfasa menjelang tahun 2020 dalam usaha meningkatkan kawalan sempadan negara secara keseluruhannya.